



## 無翼的胡蠅

颼颼飛的胡蠅，有鼻著餅幼仔的芳味，穩心仔共伊的四肢後跂展開開，歇落來桌頂，想欲舐一下較有咧，另外閣有一雙夯懸懸的前腿，相叉佇半空中刮(kueh)來刮去，誠成擎手腕欲做工課的款勢。暴暴吐吐的二蕊烏仁，正月、倒月顫一下顫一下是咧想講欲對佢一角勢，落喙去齧上蓋合，頓蹬 2、3 秒爾，就伸前腿去踏彼塊細甲強欲看袂著的餅幼仔，順繼向(ànn)落來用喙舐，氣味應該是袂糲。

我目睷皮攏無瞞，正手勻勻仔倚去伊的尻川後，差不多 20 公分遠的所在停睷落來，相(siong)千千雄雄出一下脆力，對桌面 2、3 公分懸的所在「咻」一下共掃過去，手蹄仔有捎著軟軟的物件，拄好挾佇指頭仔縫，心肝頭暢一下，對喙喝聲講：「掠著矣！」

共手蹄仔徙來胸前，聊聊仔擘開一縫仔，有眊著伊的身軀，毋過驚伊的腹肚予我捏(tēnn)一下泔(tsuh)膏，伸另外彼手的指頭仔尾溜好禮仔拈出來，閣輕輕仔纏(hân)著，翼股撻予走出來外口勢，毋敢出傷大力，才閣用正手的指甲尾，親像線穿針鼻遐爾仔細膩的手路，共薄縞絲的翼股隨片仔掣掉去，才遛手予伊跳落來桌頂，即時有一種「袂飛矣 honnh，看你倞勢！」的歡喜暗爽佇心肝頭。對掠著、掣翼到放落來桌頂，頭尾都無 10 秒，繼落去，跼桌頂跳懸跳低嘛是 5 秒爾，就栽落去塗跤兜，無看著伊的身影。

論真來講，胡蠅的跂比頭毛絲較幼，顛倒有才調跼桌頂嚟嚟越，躡(liòng)不止仔懸，定著是誠勇的款，毋過這陣的伊，足成掠狂的潑猴，氣怱怱閣變無路來，雖罔無隨伸跂出手共伊掣死，總是按呢共人凌治，正經有淡薄仔夭壽骨。

感胡蠅、蠓仔的人毋是我爾，100 个人有 99 个會出手共趕、共拍，逐工死到誠歹看的胡蠅、蠓仔，對台灣頭算到台灣尾，應該是一大拖才著，講起來我猶算有一絲仔天良。

作者：藍春瑞

### ☆詞彙學習☆

【穩心仔】ún-sim-á：安心地

【舐】tsñg：(蒼蠅等昆蟲)沾食

【擎手腕】pih-tshiú-ńg：捲起袖子

【齧】khè：啃

【千千】tshian-tshian：準確

【脆力】tshè-làt：瞬間、猛然出力

【泔膏】tsuh-ko：肚破腸流

【纏】hân：稍微繫住，不捏緊

【針鼻】tsiam-phīnn：穿線的針孔

【薄縞絲】pòh-li-si：形容非常薄

【遛手】liù-tshiú：從手上滑開

【嚟嚟越】tshiák-tshiák-tiô：不停的跳動

【掣死】juê--sí：揉死

【夭壽骨】iau-siū-kut：缺德